



Da Mot en Chile

Anne Krüger ed Oskar Klumpp passentan la stad sin l'alp da Mot e l'enviern en Chile sin lur bain.

8



Inscunter suenter 55 onns

5 dunnas ch'han frequentà avant 55 onns la scola da la claustra da Cazas en s'inscuntradas.

8

südostschweiz

LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

«100 onns Lia Rumantscha» vegn festivà a Zuoz

■ (lr) Il giubileum «100 onns Lia Rumantscha» dal 1. fin ils 18 d'avust 2019 ha lieu a Zuoz. La suprastanza da la Lia Rumantscha (LR) ha tschernì la vischnanca da Zuoz or da 13 candidaturas. Enturn il «Plaz» amez il vitg da Zuoz vul la LR crear in lieu d'inscunter e da festa durant il giubileum. Cun in appel public ha la LR tschertgà ina vischnanca rumantscha interessada dad ospitar il giubileum «100 onns Lia Ru-

mantscha» l'avust 2019. La suprastanza da la LR, presidiada da Johannes Flury, ha grond plaschair che 13 vischnancas da differentas regiuns en s'annunziadas ed han mussà interess: Albula/Alvra, Bever, Domat/Ems, Ilanz/Glion, Lantsch/Lenz, Disentis/Mustér, Puntraschna, Samedan, Scuol, Trun, Tujetsch, Zernez e Zuoz.

> PAGINA 7

Slondas sils tetgs da Medel

■ (anr/abc) Ella Val Medel, in territori compact cun structures agricolas, han ins instradad il project da mantener ils clavaus e faners cun tetg da slondas. Dapi che las arrundaziuns han fatg las vias da meglieraziun ein ils clavaus ordeifer ils vitgs danvonzs. Atgnamein savess ins schar ir en muschna quels baghetgs. Quei schabegia lu era en biars cass. Per exempel leu nua che plirs possessurs partan in baghetg. Pils treis tagliaslondas Venanzi Flepp,

Gabriel Beeli e Duri Lutz vala quei buc. Els ein possessurs persuls d'objects, e quei ha levgiu la decisiun da s'engaschar pil project dalla fundaziun Cuntrada cultivada Val Medel. Cun agid dil Fondo per la cuntrada svizra, la Tgira da monuments dil Grischun e dalla vischnanca da Medel vul la fundaziun Cuntrada cultivada Val Medel mantener quei scazi cultural.

> PAGINA 2



Ils quater faners dadens Pardé seprentan stupent.

FOTO A. BEELI

Scuol in tschercha da partenaris

■ (anr/afi) Il cumün da Scuol tschercha partenaris per realisar illa zona Quadras da la fracziun da Ftan trais stabilimaints cun abitaziuns ed affars. Üna da las ideas es tanter oter da colliar Ftan Pitschen dacheu cul quartier dal Jordan. Plünavant nu cuntainta plü la situaziun actuala da la chascharia da Ftan. Quella stess gnir adattada a las pretaisas d'hozindi. I'ls soccals da duos dals trais novs stabilimaints esa perquai previs da realisar üna chascharia moderna cun ün uschenomnä «showroom», butia ed ün bistro. Abitaziuns e

locals d'affars cumpletteschan il proget da Quadras. Tenor üna comunicaziun dal cumün da Scuol as rechatta l'areal da Quadras Ftan in ün lö ideal, in vicinanza da different affars ed es cumplettamaing accessibel. Per realisar il proget Quadras Ftan tschercha il cumün da Scuol investuors, interessents privats o eir cooperativas per fabricar abitaziuns da famiglias o per persunas in l'età avanzada. Interessents pon s'annunzchar pro Arno Kirchen, manader da l'Uffizi da fabrica cumünal da Scuol (nomer da telefon 081 861 27 22).

Cuors da rumantsch daspö 46 onns

La LR cuntinuescha a sustgnair ils cuors

DA FLURIN ANDRY / ANR

■ Tant a Samedan sco a Scuol passa tschient partecipants, l'interess pels cuors da rumantsch es eir ingon grond. Different glied predscha quists cuors per plüs motivs. Cumanzà a sporscher cuors da rumantsch ha la Fundaziun de Planta a Samedan avant 46 onns. Daspö 31 onns daja da quists cuors eir a Scuol ed in Val Müstair s'haja cumanzà tschinch, ses onns plü tard cun quels. Eir in Surselva e Surmeir daja fingià daspö lösch cuors da rumantsch. «Las experiencias sun fich positivas, id es la mità o daplü dals partecipants chi tuorman regularmaing a far quists cuors» disch Mario Pult, promotur regiunal da la Lia Rumantscha (LR). Üna part da quels chi impredan rumantsch ha ün colliaziun culla lingua o cun ün da las regiuns rumantschas. Forsa hana paraints rumantschs, fors possedna qua abitaziuns da vacanzas. «Da tschella vart esa però eir adüna daplüssas persunas chi s'interessan simplamaing pel rumantsch, sco lingua ün pa exotica», manzuna il promotur regiunal. Divers dals partecipants



Imprender rumantsch, sco qua pro'ls cuors a Scuol, as poja bain eir dadour chasa.

FOTO LR

cuntinueschan ad imprender rumantsch eir davo il cuors: «Els organischan inscunter in different lösch giò la Svizra bassa, in pitschnas gruppas as chattna per discuorrer

rumantsch.» Ün'otra gruppa sun quels chi vöglian s'integrar illa vita da cumün, impredond la lingua chi vain discurrüda qua. «La prontezza d'impender rumantsch es es-

senziala per quista lingua, perquai cuntinuescha la LR a sustgnair ils cuors da rumantsch.»

> PAGINA 7

Otgonta mauns fermes

Ils imprendists dad Implenja en acciun sin 2100 m s. m.

■ Sill'Alp Nagens sanescha la fundaziun Pro Laax dapresent il mir da cunfin. Igl ei in mir da cunfin construü avon 140 onns sin 2100 m s. m. Pil vitg puril da Laax ha quei mir giu gronda muntada, pertgei mintga sperdita si d'alp haveva consequenzas. Per proteger las vaccas dalla greppa da

Platt'Alva encunter Flem han ins baghegiu in liung mir. Quel ei ius en emblidanza e negin havess fatg stem dad el. Convischins da Laax han rendiu attent la fundaziun Pro Laax da quei fatg. Avon dus onns ha il president da quella, Erwin Ardiser, ensemen cul melder digl uffeci da baghegiar, Au-

gustin Calivers, fatg in'uatga al liug ensemen cul specialist per mirs schetgs Matthias Götsch. E questa jamna vegn el sanaus. 40 imprendists dall'Implenja, la pli gronda interpresa da baghegiar dalla Svizra, prestan lavur cumina.

> PAGINA 3



La promozion dalla litteratura schai fetg a cor a Viola Pfeiffer, la presidenta dall'Uniu per la Litteratura Rumantscha.

FOTO S. ROTHMUND

In cametg da leger

■ (anr/sr) Dalla litteratura selai Viola Pfeiffer bugen menar en auters munds, auters temps ed autras vetas. Actualme in lavura la presidenta dall'Uniu per la Litteratura Rumantscha ch'ha studegiu romantsch, tudestg e historia a Turitg vid sia dissertaziun. Pfeiffer ei carschida si ella Bassa en ina famiglia romantscha. Sia identitad descriva ella sco Romantscha dalla Bassa. Da casa eis ella leu nua ch'ei vegn discurreu romantsch e quei sa esser dapertut. Pfeiffer legia bia e bugen ed ella scriva era per romantsch e per tudestg. A nossas lecturas e nos lecturs ein sias columnas en LQ segir enconuscentas. Il portret raquenta ella da sia gronda pissiun – la litteratura – e tradescha era ch'ella sappi leger e reglar caussas fetg spert. Quei vesa ella sco fermezia che sa era esser ina fleivlezia.

> PAGINA 5



Ils imprendists renoveschan quest jamna rodond 300 meters dil mir.

FOTO A. BEELI



40029

Servetsch d'abunents e da distribuziun: tel. 0844 226 226 mail: abo@somedia.ch